

Terpesong

(Untuk kawan-kawan yang terkeliru dengan sajak (*Terkorban*) keluaran Qalam September 1961)

Kalau adik-adik di langit tersenyumlah hati
Kalau adik-adik di bumi seribu lukisan menghias bibir,
Tapi adik-adik tergantung di angkasa
Datang angin terumbang-ambing lalu terhempas menjadi mangsa.

Manakah hati yang tidak remuk?
Manakah mata yang tidak menangis?
Akar dan tunjang terjatuh ke langit
Daun yang menghijau telah lalu dipupus bayu.

Bunga yang mewangi hapus terbakar
Tasik-tasik biru yang dicipta telah kering tak berair,
Kerana setitik racun maka matilah segala yang bernafas
Musnahlah segala kemusnahan, hancurlah segala harapan.

Bukanlah seribu tahun kita ingin membilang jari!

Hidup ini sudah tidak bererti lagi
Peribadi hancur dan mati terkulai di tasik madu.
Hancurlah harapan di balik sinaran
Gerhanalah matahari di balik awan.

Datanglah ilhad membakar jiwa
Hanya lukisan menghias dada
Tanpa perhitungan kepada anak-anak kerdil yang tak berdosa,
Terkinja-kinja menari tanpa irama dan nada.

Hancurlah jiwa, hancurlah sayang
Di taman puspa kesayangan bonda.

Sastrawardi.

Kolej Islam Malaya,
9 September 1961.
(Mengambil sempena hari penyampaian sijil)